

# LÖG FERÐAFÉLAGS ÍSLANDS

## 1. gr.

Félagið heitir Ferðafélag Íslands. Heimili þess og varnarþing er í Reykjavík. Félagið nær til alls landsins og hefur innan sinna vébanda, auk Ferðafélags Íslands, sem hefur aðsetur í Reykjavík, deildir, sem stofnaðar eru og starfa samkvæmt 7. gr laga þessara. Ferðafélag Íslands og deildirnar starfa saman eftir því sem nánar er ákveðið í lögum þessum.

## 2. gr.

Félagið er áhugamannafélag og er tilgangur þess að stuðla að ferðalögum á Íslandi og greiða fyrir þeim.

## 3 gr.

Tilgangi sínum hyggst félagið ná á eftirfarandi hátt:

1. Með útgáfu ferða- og landlýsinga og gerð uppdrátta og leiðarvísa.
2. Að gangast fyrir byggingu og rekstri sæluhúsa.
3. Að stuðla að merkingu gönguleiða í óbyggðum og byggingu göngubríua á þeim leiðum.
4. Að gangast fyrir ferðalögum, til að kynna mönnum náttúru landsins og sögu merkra staða.
5. Að stuðla að góðri umgengni ferðamanna og vernd náttúru landsins, m.a. með samstarfi við umhverfis- og náttúruverndaraðila.
6. Að koma á og efla vinsamlegt samstarf við innlend og erlend ferðafélög, sem starfa á svipuðum grundvelli.
7. Að koma fram gagnvart stjórnvöldum landsins í öllum málum sem lúta að stefnumálum þess.

## 4. gr.

Félagar geta allir orðið en kjörgengi og kosningarétt hafa einungis íslenskir ríkisborgarar, sem hafa náð 16 ára aldri. Félagar innan 16 ára greiða ekki árgjald og fá ekki árbók. Árgjald skal ákveðið af stjórn félagsins og er Árbók félagsins innifalin í því. Fjölskyldufélagar greiða lægra árgjald og er Árbók ekki innifalin.

Stjórn félagsins getur valið heiðursfélaga og kjölfélaga vegna sérstakra starfa í þágu félagsins og skulu þeir vera gjaldfrjálsir. Einnig getur stjórnin heiðrað menn fyrir störf í þágu félagsins með því að sæma þá gullmerki F.Í.

## 5. gr.

Stjórn félagsins skipa 7 félagsmenn auk forseta og varaforseta. Skal kjörtímabil þeirra vera í þrjú ár og þrír kosnir á hverjum aðalfundi þannig:

1. Forseti skal kosinn sérstaklega og tveir meðstjórnendur til þriggja ára.
2. Varaforseti kosinn sérstaklega og tveir meðstjórnendur til þriggja ára.
3. Þrír meðstjórnendur til þriggja ára.
4. Til undirbúnings stjórnarkjöri ár hvert skal starfa þriggja manna kjörnefnd er geri tillögur til aðalfundar um menn í stjórn, að minnsta kosti jafn marga og kjósa ber hverju sinni samkvæmt ákvæðum í 1. – 3. lið hér að framan.  
Undanfarandi aðalfundur kýs einn mann í þessa kjörnefnd, en stjórn félagsins tilnefnir síðan hina tvo. Hið fæsta þrír fullgildir félagsmenn utan kjörnefndar geta borið fram tillögur um menn í stjórn félagsins. Öllum tillögum skal skila innan tilskilins frests samkvæmt ákvæðum 8. greinar.

Stjórnin heldur að jafnaði fundi mánaðarlega, ellefu sinnum á ári, en oftast ef brýna nauðsyn krefur. Skýlt er að halda stjórnarfund, ef einn stjórnarmaður krefst þess. Jafnan skal haldinn stjórnarfundur sem fyrst eftir aðalfund. Á þeim fundi skal stjórnin skipa í eftirtaldir starfsnefndir til eins árs í senn: Bygginganefnd, ferðanefnd, ritnefnd og útbreiðslunefnd. Stjórnin ákveður tölu nefndarmanna og geta þeir einnig verið utan stjórnar. Skipar stjórnin formenn nefnda. Ef formaður nefndar er utan stjórnar skal hann sitja fundi stjórnarinnar og framkvæmdarstjórnar þegar rætt er um málefni, sem varða nefnd þá, sem hann er formaður fyrir.

Stjórnin skal fjalla um megindrætti í starfsemi félagsins og gera ályktun þar um ef þurfa þykir.

Stjórnin kýs sér ritara og gjaldkera til eins árs.

Stjórnin kýs einn mann úr sínum hópi til eins árs, sem ásamt forseta, varaforseta, ritara og gjaldkera mynda framkvæmdastjórn til félagsins og eru forseti og varaforseti formaður og varaformaður framkvæmdastjórnar.

Stjórnin getur ráðið framkvæmdastjóra til að annast daglegan rekstur félagsins og setur honum erindisbréf. Hann er einnig háður fyrirmælum framkvæmdastjórnarinnar.

Stjórnarfundir eru lögmætir ef fimm stjórnarmenn sitja fund.

Stjórnin getur falið framkvæmdastjórninni tiltekin verkefni til úrlausnar eða meðferða, en framkvæmdastjórnin fer með málefni félagsins milli stjórnarfunda í umboði stjórnarinnar. Fundir framkvæmdarstjórnar eru lögmætir ef þrír framkvæmdastjórnarmenn sitja fund. Fundargerðir framkvæmdastjórnar skulu þegar sendar öllum stjórnarmönnum.

Á fundum stjórnar og framkvæmdastjórnar ræður afl atkvæða um þær ákvarðanir sem teknar eru. Falli atkvæði jöfn, ræður atkvæði forseta.

Framkvæmdastjórnin skal gefa skýrslu um starfsemi félagsins í upphafi hvers fundar stjórnar og framkvæmdastjórnar. Framkvæmdarstjóri og aðrir fastráðnir starfsmenn félagsins skulu ekki eiga sæti í stjórn eða framkvæmdastjórn félagsins.

## 6 .gr.

Stjórnin má ekki ráðstafa fasteignum félagsins nema  $\frac{3}{4}$  hlutar stjórnarinnar samþykki það á lögsmætum stjórnarfundi.

## 7. gr.

Stofna má sérstakar félagsdeildir utan Reykjavíkur í samráði við stjórn félagsins. Stofnfélagar slíkra deilda mega þó eigi vera færri en 50 og árgjald eigi lægra en hjá Ferðafélagi Íslands. Deildirnar starfa sjálfstætt og hafa sjálfstæðan fjárhag en helmingur af árgjaldi deildarféлага rennur í sjóð Ferðafélags Íslands, enda fái þeir Árbók félagsins og njóti í hvítvetna sömu hlunninda og aðrir félagsmenn.

Félagsdeildir kenna sig við hérað sitt eða bæ. Í lögum deildanna skal það koma fram að tilgangur með starfsemi þeirra sé hinn sami og segir í lögum F.Í. Í hverri félagsdeild skal haldin félagaskrá. Á hvert skal haldinn aðalfundur deildar og sé reikningsár deildar almanaksárið. Stjórn deildar gerir skýrslu um starfsemi deildarinnar, sem lögð skal fyrir aðalfund hennar ásamt endurskoðuðum ársreikningum. Skýrsla þessi ásamt ársreikningum skal jafnframt send stjórn Ferðafélags Íslands, sem er heimilt að birta hana.

Ungmennadeildir og aðrar deildir, sem vinna að sérstökum áhugamálum á starfssviði Ferðafélagsins, t.d. fjallagöngum, má og stofna á hinum ýmsu félagssvæðum, enda verði þeim hagað eftir reglum sem félagsstjórnin setur. Um deildir samkvæmt þessari mgr. gilda að öðru leyti sömu reglur og um Ferðafélag Íslands.

Stjórn Ferðafélags Íslands fylgist með starfsemi deilda og aðstoðar þær eftir því sem við verður komið. Sé um að ræða sameiginleg framlög Ferðafélags Íslands og deildar til framkvæmda eða annarra þarfa, skal gerður um það samningur þar sem eignarhlutur hvors aðila um sig sé tilgreindur, ef við á og kveðið á um forræði eigna eða framkvæmda. Hið sama skal gilda um sameignir deilda og sameignar Ferðafélags Íslands eða deilda þess og annarra aðila.

Hafi félagsdeild eigi fullnægt skilyrðum þeim, sem greint er frá í 2. mgr. í þrjú ár, skal stjórn Ferðafélags Íslands boða til fundar í deildinni er taki ákvörðum um slit deildarinnar eða skipan mála til frambúðar. Um dagskrá fundarins skulu gilda ákvæði 8. gr laga Ferðafélags Íslands eftir því sem við á. Til fundarins skal boða með fundarboði er senda skal öllum félögum deildarinnar tveimur vikum fyrir boðaðan fund.

Sé félagsdeild slitið fer um eignir deildarinnar eftir ákvæðum í lögum hennar. Hafi eigi verið mælt fyrir um ráðstöfun eigna í lögum félagsdeildar, renna þær við félagsslit til annarra deilda Ferðafélags Íslands er átt hafa sameiginlegar fasteignir með deild þeirri er slitið var, en ella til Ferðafélags Íslands.

Eigi sjaldnar en á tveggja ára fresti skal stjórn Ferðafélags Íslands boða til sameiginlegs fundar stjórnar Ferðafélagsins og formanna og/eða fulltrúa deildanna, þar sem rædd eru málefni, sem efst eru á baugi hverjum tíma og snerta starfsemi Ferðafélags Íslands og

deildanna. Stjórn Ferðafélagsins skal með fundarboði tilkynna dagskrá að höfðu samráði við stjórnir deildanna.

### **8. gr.**

Aðalfundur og félagsfundir hafa æðsta vald í málefnum félagsins. Reikningsár skal vera almanaksárið og skal aðalfundur haldinn í marsmánuði ár hvert.

Dagskrá aðalfundar skal vera sem hér segir:

1. Skýrsla forseta um starfsemi félagsins á árinu sem leið.
2. Framkvæmdastjóri leggur fram endurskoðaða reikninga félagsins.
3. Lagabreytingar.
4. Kosin stjórn skv. 5. gr. félagslaganna.
5. Kosnir tveir skoðunarmenn og einn til vara.
6. Önnur mál.

Aðalfundur skal haldinn í Reykjavík og auglýstur í dagblöðum og útvarpi með viku fyrirvara. Atkvæðisrétt og kjörgengi á aðalfundi hafa þeir einir sem:

1. greitt hafa félagsgjald fyrir næstliðið ár og
2. gengið hafa í félagið fyrir næstu áramót á undan aðalfundi.

Enginn getur falið öðrum að fara með atkvæði sitt á aðalfundi eða félagsfundi.

Til félagsfundar getur stjórnin boðað þegar henni þykir ástæða til. Einnig skal haldinn félagsfundur ef fleiri en 100 félagar sækja þess skriflega. Til félagsfundar skal boðað með minnst viku fyrirvara.

Tillögur um lagabreytingar og stjórnarkjör, sem leggjast eiga fyrir aðalfund skulu hafa borist stjórninni fyrir 1. febrúar og liggja frammi á skrifstofu félagsins. Aðalfundur er lögmætur ef löglega er til hans boðað. Á aðalfundi og félagsfundum ræður einfaldur meirihluti úrslitum mála. Eigi má þó slíta félaginu nema það verði samþykkt á tveimur lögmætum fundum með minnst mánaðar millibili og hafi fundarefnis verið getið í fundarboðum. Verði félaginu slitið skal eigum þess ráðstafað til hliðstæðs félags eða stofnunar.

### **9. gr.**

Til lagabreytinga þarf samþykki 2/3 hluta gildra atkvæða á aðalfundi, þó má ekki breyta ákvæðum 2. gr. félagslaganna, um tilgang félagsins og ákvæðum síðustu málsgreinar 8. gr. um ráðstöfun á eignum þess.

Reykjavík, 22. mars 1995  
ásamt breytingum samþ. 1998, 2001 og 2006